



Terenga 3: Hōtaka 31 - He kīanga

He Mihi

Kei ngā ringa raupā, kei ngā ringa raupā o te tī, o te tā, e maimoa nei i tēnei reo matahīapo i waiho mai ai ki a tātou. Tēnā rā koutou. Nau mai.

Hei Mahi Whakarongo

Kia whati atu tātou ki te hōtaka o Whakataukī me ngā kōrero rangatira kua hopukina hei matapaki mā te hunga pīkoko ki te ako i te reo. Anei ngā pātai hei whakautu mā koutou:

- 1) Ko wai ngā hoa pakanga o Tūhoe?
- 2) He kupu whakarite te 'matakahi' ki a wai?
- 3) E whakaritea ana a wai ki te 'tōtara'?

He Whakamārama

Kei te rangona whānuitia te kīwaha Pākehā nei, '*Nek minute*', engari kei tahuri tātou ki te whakamāori i tēnei kīwaha kia puta ko '*Neke mēneti*'. Anei kē te kīwaha Māori hei whakapuaki i te āhua ka puta ā muri tata tonu i tētehi mahi.

...mea rawa ake...

Anei ētehi tauira:

1. Ka papā te whatitiri i te rangi, **mea rawa ake**, ka heke te marangai.
2. I kai au i te heihei pirau, **mea rawa ake**, ka pā mai te mate tikotiko.

He kīanga anō i rangona i te kōrero a Wharehuia mō te taka o te wā, hei hono i ngā kōrero e rua.

'Nāwai rā, nāwai rā...'

Anei ētehi tauira:

1. Ka paopaohia te matakahi, **nāwai rā, nāwai rā** ka tiwara te rākau.
2. I whai te tira i te huarahi i takahia ai e tō rātou tupuna, **nāwai rā**, ka tae ki tōna kāinga.

Hei Mahi

Whakaotihia ngā rerenga e whai ake nei.

1. I rāhuitia te reo Pākehā i te whare o Mere rāua ko Haki...
2. I pā te ringa o te tama ki te kurī...
3. E rima ngā inu waipiro a Hoani i roto i te hāwhe hāora...
4. I whakatoihia a Here e ana hoa i te kura...

He Whakautu:

1. ...nāwai rā ka noho ko te reo Māori te reo matua o te whānau.
2. ...mea rawa ake, ka ngaua.
3. ...mea rawa ake ka haurangi, ka ruaki.
4. ...mea rawa ake, ka puku te rae o Here.